

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON
OPĆINSKI SUD U JAJCU
Broj: 128 0 K 045065 25 K
Jajce, 16.05.2025. godine

U IME FEDERACIJE BOSNE I HERCEGOVINE !

Općinski sud u Jajcu, sudija Alem Ribić, uz sudjelovanje Ganibegović Esme kao zapisničara, u krivičnom predmetu protiv optuženog E. B., zvaní „E.“, sin J., radi izvršenja krivičnog djela „Oštećenje tuđe stvari“ iz čl. 293. stav 1. KZ FBiH (u daljem tekstu: KZ F BiH), po optužnici Kantonalnog tužilaštva Travnik broj: T06 0 KT 0036840 25 od 25.02.2025. godine, nakon održanog glavnog pretresa dana 14.05.2025. godine u prisustvu kantonalnog tužioca Frane Marjanović i optuženog E. B., zvaní „E.“, donio je i javno objavio dana 16.05.2025. godine:

P R E S U D U

Optuženi:

E. B. zvaní „E.“, sin J., i majke H., rođene V., rođen „. godine u J., nastanjen u ..., općina J., po nacionalnosti ..., državljanin ..., JMBG: ..., pismen, SSS, po zanimanju trgovac, neoženjen, bez djece, srednjeg imovnog stanja, osuđivan: „[...]“¹

K R I V I J E

Što je:

U noći 19.01.2025. godine oko 21,30 sati, u ulici Kralja Tvrtka I općina Jajce, u ugostiteljskom objektu caffè bar „Vitić“ vlasništvo D. V. pod utjecajem alkohola od 2,20 promila svjestan da zbog svog činjenja može oštetiti tuđu stvar što je i htio, ušao u šank i upotrebom fizičke snage uzeo fiskalni aparat koji se nalazio na drvenoj polici iza šanka, koji je potom bacio na pod pri čemu je uzrokovao oštećenja zbog kojih je onemogućena redovna upotreba fiskalnog aparata, na koji način je oštetio D. V..

Dakle, oštetio tuđu stvar,

Čime bi počinio kazneno djelo Oštećenje tuđe stvari iz čl. 293. st. 1. KZ F BiH, te primjenom gore navedenih odredbi sud optuženog E. B.

KAŽNJAVA

Za krivično djelo „Oštećenje tuđe stvari“ iz člana 293. stav 1. KZ FBiH

NOVČANOM KAZNOM U IZNOSU OD 500,00 KM
(slovima: pet stotina konvertibilnih maraka)

¹ Ispušteni su podaci iz kaznene evidencije

Oštećeni D. V. se upućuje da (eventualni) imovinsko - pravni zahtjev radi naknade materijalne štete može ostvariti u parničnom postupku.

Temeljem odredaba čl. 202 st.1 ZKP – a FBiH optuženi se obavezuje nadoknaditi troškove krivičnog postupka u iznosu od 50,00 KM (pedeset konvertibilnih maraka).

Obrazloženje

Aktom broj: T06 0 KT 0036840 25 od 25.02.2025. godine, Kantonalno tužilaštvo Travnik, podiglo je optužnicu protiv optuženog E. B. kojom se optuženom stavlja na teret da je počinio krivično djelo “Oštećenje tuđe stvari” iz čl. 293. stav 1. KZ FBiH.

Navedena optužnica je od strane ovog suda potvrđena 04.03.2025. godine, te se optuženi E. B. na ročištu povodom izjašnjenja o krivnji dana 27.03.2025. godine izjasnio riječima „Kriv sam“ po potvrđenoj optužnici broj: T06 0 KT 0036840 25 od 25.02.2025. godine.

U datoj uvodnoj riječi na održanom ročištu za izricanje krivičnopravne sankcije od dana 14.05.2025. godine, a nakon pretresa za razmatranje izjave o priznavanju krivnje Kantonalni tužilac izjavi: Kako je optuženi priznao krivnju za kazneno djelo predlažemo da istoga oglasi krivim sukladno zakonu, a da prilikom odmjeravanja sankcije uzme u obzir sve okolnosti kako otežavajuće tako i olakšavajuće, a sve u cilju ostvarivanja svrhe kažnjavanja.

Kod date izjave o priznanju krivice optuženi E. B. je ostao tokom cijelog provedenog postupka tj. kako u fazi izvođenja dokaza tako i u završnim riječima, te izjavi: Navedeno krivično djelo sam počinio izrevoltirano i u alkoholiziranom stanju, kajem se i nisam osoba sklona činjenju krivičnih djela kao što se sud može uvjeriti da ranije nisam ni krivično ni prekršajno kažnjavan.

U provedenom postupku optužba je izvela dokaze čitanjem istih u koje je krivični sud izvršio uvid kako slijedi: Službena zabilješka o prijem usmene krivične prijave putem telefona, PS Jajce, broj: 02/5-3-04-11-05/25 od 22.01.2025. godine, Službena zabilješka, PS Jajce, broj: 02/5-3-1-04-9-2-16/25 od 20.01.2025. godine, Službena bilješka, PS Jajce, broj: 02/5-3-03-2-10-66/25 od 14.02.2025. godine, Foto-dokumentacija PC Jajce broj: 02/5-3-03-2-9-04/25 od 19.01.2025. godine, Zapisnik o alkotestiranju počinioca prekršaja po JRM, PS Jajce, broj: 02/5-3-04-11-09/25 od 19.01.2025. godine, Zapisnik o lišenju slobode, PS Jajce, broj: 05/25 od 19.01.2025. godine, Zapisnik o otpustu osobe lišene slobode, PS Jajce, broj: 05/25 od 20.01.2025. godine, Izvod iz kaznene evidencije za osumnjičenog E. B., PS Jajce, broj: 02/5-3-03-2-27/25 od 30.01.2025. godine.

Svi provedeni dokazi u skladu sa odredbom člana 296. Zakona o krivičnom postupku FBiH (u daljem tekstu: ZKP FBiH) cijenjeni su u svojoj cjelini, te svaki dokaz pojedinačno i u vezi sa ostalim dokazima.

Sud konstatuje da je optuženi E. B. u toku cijelog postupka ostao kod date izjave o prihvatanju krivice za krivično djelo koje mu se podnesenom optužnicom stavlja na teret, te da izvedeni dokazi u toku postupka pružaju dovoljno osnova za zaključak da je upravo optuženi počinio krivično djelo na način kako je to navedeno u podnesenoj optužnici u pogledu mjesta, vremena i radnji izvršenja kojima je optuženi ostvario sva bitna obilježja opisnog krivičnog djela.

Članom 293. krivičnog Zakona F BiH (Sl. novine F BiH 36/03, 21/04-Ispr 69/04, 18/05, 42/10, 42/11, 59/14, 76/14, 46/16, 75/17 i 31/23) u stavu 1 propisano je „Ko ošteti, uništi ili učini neupotrebljivom tuđu stvar, kaznit će se novčanom kaznom ili kaznom zatvora do šest mjeseci.”.

Krivični sud je priznanje optuženog za počinjeno krivično djelo koje mu se stavlja na teret doveo u vezu sa izvedenim materijalnim dokazima optužbe, pa je uvidom u: Službenu zabilješku o prijem usmene krivične prijave putem telefona, PS Jajce, broj: 02/5-3-04-11-05/25 od 22.01.2025. godine sud utvrdio da je sačinjena dana 22.01.2025. godine u 1:10 sati u službenim prostorijama PS – Jajce od strane vođe smjene M. K. povodom prijave krivičnog djela „Oštećenje tuđe stvari“ iz člana 293. KZ FBiH. Dana 19.01.2025. godine u 21:45 sati se telefonom u PS Jajce obratio D. V., sin M., koji je prijavio da je osoba E. B., zvan i „E.“ razbio fiskalnu kasu u caffe bar „Vitić“ koji se nalazi u ulici Kralja Tvrtka. Uvidom u Službenu bilješku, PS Jajce, broj: 02/5-3-1-04-9-2-16/25 od 20.01.2025. godine koju je sačinio kriminalistički istražitelj J. M., sud je utvrdio da je ista sačinjena na okolnosti izlaska na lice mjesta radi vršenja uviđajnih radnji u ugostiteljskom objektu caffe bar „Vito“ koji se nalazi u ulici Kralja Tvrtka I broj 64, a po prijavi krivičnog djela „Oštećenje tuđe stvari“. Dana 19.01.2025. godine u 22:00 sati kao dežurni kriminalistički istražitelj od strane operativnog dežurnog obaviješten sam da se putem telefona u PS Jajce obratio D. V., sin M. i prijavio E. B., sin J. da mu je isti došao u ugostiteljski objekat caffe bar „Vito“, te ušao u šank i razbio fiskalnu kasu na način da je bacio na pod. Izlaskom na lice mjesta policijska patrola je potvrdila navode prijave. U 22:20 sati zajedno s dežurnim kriminalističkim tehničarom S. I. izašli smo na lice mjesta, te izvršili uviđajne radnje. Dolaskom na lice mjesta utvrđujemo da se radi o obiteljskoj kući D. V., a u kojoj je na prizemlju smješten caffe bar „Vito“ koja se nalazi u ulici Kralja Tvrtka I broj 64. Na pomenutom objektu se nalaze ulazna vrata izrađena od drveta, ulaskom u pomenuti objekat dolazimo do mjesta događaja, te u šanku pronalazimo razbijenu fiskalnu kasu, obilježenu rednim brojem 1. lice mjesta fotografirano. Uviđajne radnje završene u 23:00 sati. Uvidom u Službenu bilješku, PS Jajce, broj: 02/5-3-03-2-10-66/25 od 14.02.2025. godine koju je sačinio J. M. sud je utvrdio da je ista sačinjena u službenim prostorijama PS Jajce na okolnosti postupanja po prijavi od dana 19.01.2025. godine. Dana 19.01.2025. godine u 22:00 sati kao dežurni kriminalistički istražitelj od strane operativnog dežurnog obaviješten sam da se putem telefona u PS Jajce obratio D. V., sin M. i tom prilikom prijavio E. B., sin J., da je isti došao u ugostiteljski objekat caffe bar „Vito“ koji je u njegovom vlasništvu, te ušao u šank i razbio fiskalnu kasu, na način da ju je bacio na pod, koje navode prijave je policijska patrola potvrdila izlaskom na lice mjesta. Službenici OKP PS Jajce su izašli na lice mjesta i obavili uviđajne radnje na koje okolnosti je sačinjena i Službena zabilješka broj: 02/5-3-1-04-9-2-1625 JM od 20.01.2025. godine, te je ista dostavljena KT Travnik uz izvještaj o počinjenom kaznenom djelu broj: 02/5-3-03-2-9-01/25 od 28.01.2025. godine. Na okolnosti izlaska na lice mjesta sačinjena je i fotodokumentacija broj: 02/5-3-03-2-9-04/25 SI od 10.02.2025. godine, te je ista dostavljena KT Travnik aktom broj: 02/5-3-03-2-10-35/25 JM od 12.02.2025. godine. U cilju utvrđivanja traženog aktom KT Travnik broj: T06 0 KT 0036840 25 od 11.02.2025. godine službenici OKP PS Jajce su pozvali lice D. V. i sa istim obavili informativni razgovor kojom prilikom je imenovani naveo da je predmetna kasa uništena, te da je za popravak iste platio iznos od 400,00 KM, obzirom da bi mu, kako je naveo, kupovina nove trajala tri mjeseca, te bi račune morao izdavati na način da popunjava ovjeren paragon blok. Uvidom u Fotodokumentaciju PC Jajce broj: 02/5-3-03-2-9-04/25 od 19.01.2025. godine sud je zaključio da se na prikazanim fotografijama prikazuje širi i bliži izgled lica mjesta ugostiteljskog objekta caffe bar „Vito“ sa prikazom ulaznih vrata i predulaza. Fotografije 3-4 prikazuju šank u ugostiteljskom objektu caffe bar „Vito“ na kojem je zatečena razbijena fiskalna registar kasa

rastavljena i neupotrebljiva, na fotografijama označena brojem 1. Uvidom u Zapisnik o alkotestiranju počinioca prekršaja po JRM, PS Jajce, broj: 02/5-3-04-11-09/25 od 19.01.2025. godine sud je utvrdio da je testirani E. B. dobrovoljno pristao na testiranje i ne negira da je pod uticajem alkohola, gdje je uvidom u alkometar marke Alcoquant utvrđeno da isti ima 2,20 promila alkohola u krvi. Uvidom u Zapisnik o lišenju slobode, PS Jajce, broj: 05/25 od 19.01.2025. godine sud je utvrdio da je optuženi E. B. 19.01.2025. godine lišen slobode, a uvidom u Zapisnik o otpustu osobe lišene slobode, PS Jajce, broj: 05/25 od 20.01.2025. godine sud je utvrdio da je optuženi otpušten dana 20.01.2025. godine iz razloga jer su prestali razlozi sa zadržavanjem. Uvidom u Izvod iz kaznene evidencije za osumnjičenog E. B., PS Jajce, broj: 02/5-3-03-2-27/25 od 30.01.2025. godine sud je utvrdio da je optuženi ranije osuđivana osoba, ranije je osuđivan presudama koje osude su obrisane, a presude su navedene u optužnici Kantonalnog tužilaštva i u izreci ove presude.

S obzirom na sve izvedene dokaze, cijeneći svaki od izvedenih materijalnih dokaza zasebno i dovodeći ih u međusobnu vezu, kao i u vezu sa izričitom izjavom o priznanju krivnje optuženog za počinjeno krivično djelo, krivični sud je zaključio da je optuženi počinio krivično djelo koje mu se stavlja na teret, a opisano kao u izreci ove presude, te optuženog novčanom kaznom i kaznio za počinjenje krivičnog djela „Oštećenje tuđe stvari“ iz člana 293 stav 1 KZ FBiH.

Prilikom odlučivanja o vrsti i visini krivične sankcije, sud je cijenio sve okolnosti predviđene članom 7., 42. i 49. KZ FBiH, te je od olakšavajućih okolnosti uzeo u obzir da je optuženi u ranoj fazi postupka, (pa i u samoj istrazi) priznao krivicu za počinjenje krivičnog djela čime je doprinio da se krivični postupak završi efikasno i ekonomično, dakle što brže, kao i činjenicu da je optuženi prethodno osuđivana osoba, ali presude kojima je isti osuđivan su brisane, tako da je krivični sud optuženog prilikom izricanja kazne istog tretirao kao neosuđivanu osobu, te mu prethodno izrečene osude u smislu njegovog ranijeg života koje su brisane nije uzeo kao otežavajuće okolnosti. Pored navedenog optuženi je pred sudom izrazio kajanje zbog učinjenog krivičnog djela jer je isto uradio izrevoltiran i pod dejstvom alkohola (izrevoltiran činjenicom da je sa oštećenim ranije radio skupa i kada je razradio posao oštećeni je nastavio da radi dalje sam u svom objektu- što je izjavio i u fazi istrage), te uvažavajući činjenicu da ovaj sud kod optuženog nije našao otežavajućih okolnosti, sud je cijenio da će izricanje novčane kazne, koja je primarno određena kao sankcija prilikom izvršenja ovog krivičnog djela, biti svrsishodno učinjenom krivičnom djelu i uticati na budući život optuženog, tako da krivični sud zaključuje da je izrečena kazna srazmjerna učinjenom krivičnom djelu uvažavajući sve gore navedeno

Sud je oštećenog D. V. uputio da svoj (eventualni) imovinsko – pravni zahtjev usmjeren na naknadu materijalne štete može ostvariti u parničnom postupku temeljem odredbe člana 212. stav 3. ZKP – a FBiH.

Sud je na ime troškova krivičnog postupka – sudskog paušala optuženog E. B. obavezao da ovom sudu nadoknadi iznos od 50,00 KM uzimajući u obzir složenost i dužinu trajanja ovog postupka u roku od 30 dana od pravosnažnosti ove presude se u skladu sa članom 202. st. 1. ZKP-a FBiH.

S obzirom na sve izloženo, krivični sud je odlučio kao u izreci presude.

Zapisničar

Sudija

Esma Ganibegović

Alem Ribić

Pouka o pravnom lijeku:

Protiv ove presude može se izjaviti žalba Kantonalnom sudu u Novom Travniku preko ovog suda u roku od 15 dana od dana prijema presude. Žalba se podnosi u dovoljnom broju primjeraka za sud i protivnu stranku.